

G16-04-006

复四川提台宋^[6]

光绪十六年四月初二日

祝三仁弟官保麾下：

宋镇回防，泐复一缄，计达记室。顷奉前月二十五日惠函并文牒，具悉壹是。马提督夙隶军麾，久从征剿，战功将略，侪辈所推，留役西陲，勤劳尤著。兹因关外事定，赴引东归，昨经麾下函招来旅。该提督眷恋戎旃之旧，仍奋边塞之思，拟缓赴都，相从防海，足为东夏备一干城之选，不止在雄军增一旧部之资，容俟附片奏闻，再具公牒咨达。津门早燠，近始稍凉，三月以来，十日一雨，农田沾渥，可望有秋。旅防气候如何，尚希随时卫摄。泐复，敬颂勋祺，诸惟朗照。不具。愚兄。

G16-04-007

致李经方^[3]

光绪十六年四月初三日巳刻

方儿阅悉：

昨复一缄，今早唐景星核算分年还本带利详细清折，朗若列眉，只须十六年，筹银四千万，本利全清，尚不须五千万之多，奥商若肯照办，实为合算。汝可速送庆邸，请其转呈醇邸，但说明该商若必多拖年限，则利息加多矣。俟季同有复电请示，我即转电汝，速照译两份，亲送二邸，候回示（汝如不在寺内，须令速送或速回，办竣再出应酬，时刻早晚不定）。前复邸电，漏未封入函内，仍补寄。四婶寄五姊物件，连信送去。闻初十发榜，即令任永清派沿途马拨，以便速递捷报。仪叟书。

G16-04-008

复署山东济宁直隶州正堂蹇^[6]

光绪十六年四月初四日

宣甫世仁弟刺史阁下：

前接惠函，欣悉专车荣莅新治。顷复承缄寄多仪，济城酱菜绝佳，陈墨尤古，远道相将，殷拳雅意，曷胜纫愧。执事需次十载，始得一州，自由大府推择资劳，并知清况。此于东省，号为剧地，治理正借长才。并闻下车之初，暘雨应时，闾阎绥靖，民情既极和乐，吏治更易为功。展布从容，良殷企祝。近畿三月以来，十日